

## **SOTA PILMIRON SOLAT NEN SAN PABLO PARA SO NEN TIMOTEO**

<sup>1-2</sup> Si-kak si Pablo ja makasolat niyay et sajay ya solat ko, para son si-kam Timoteo, ja naka ikarin anak ko shi pamati. Jet say shawat ko son Apo Shiyos, sapay koma ta sota kaasi, tolong, tan talna, ja edapo so nen Apo Shiyos ja Ametayo tan si Cristo Jesus ja Apo tayo, sotan i ma-shoman koma son si-kam. Itnengim iya ikowan ko son si-kam, tep si-kak i apostol nen Cristo Jesus, ta si-katoy bilin nen Apo Shiyos ja engisedakan son si-katejo, tan si-katoy bilin nen Cristo Jesus ja kawad-an ni namnama tayo.

### *Itoded mon memidin ira nonta apil i toro sha*

<sup>3</sup> Piyan kon ipinshowa sota inkowan ko son si-kam nonta shanshanin ondawak shi Masidonia. Jet say inkowan ko nontan, pan-iyan ka shi Ipiso et say dag-en mod man, bilin mo ira sota toon apil i shaka itodtoro say ibi-jag sha.

<sup>4</sup> Ikowan mo son si-kara ey isalsheng sha sota shaka dagdag-a ja shaka pemat i nonta shiba ni toon bayag, tan shaka pemasa ni olay nonta ngaranganan ni ap-apora nonta bayag da. Ta sajay i mengi-kan ni panshowashowa-an ni pamati ni eshom. Say piyan nen Apo Shiyos, saksakey komay pamati son Cristo, jet sota kowan ni eshom ma tood Ipiso, enshiy to itolong pangkep ni pengonod son si-kato.

<sup>5</sup> Say pangkep tayon memidin ni angken sipa, piyan tayon mewad-an ira ni semek ja mandepod mapteng nga nemnem, tan say memati iren kosto.

<sup>6</sup> Waray eshom ma toon dinibkan sha iyay ya mapteng nga pangkep tayo et nakol ni notnot mala ni kait sha i shaka dagdag-a.

<sup>7</sup> Piyan shen mengitosho ira nonta bilin nen Apo Shiyos ja in-awat to nonta bayag da, nem eg sha amtay banag nonta shaka ikokowan, ono olog nonta shaka ipilpilit ey onoren ni totoo.

<sup>8</sup> Nem si-katejo, amta tayo met ey sota bilin nen Apo Shiyos nonta bayag da, mapteng, no ma-osal shi koston ka-osalan to.

<sup>9</sup> Isonga mesepol la ewatan koma ni too ey sajay ya bilin, in-awat nen Apo Shiyos say mebidin koma sota eg memapatpati son si-kato. No nan-i-inges komen mapteng nga emin i too, eg to koma in-awat iyay ya bilin. Sajay iren kalasin too, si-katoy kabol la nay-awatan niya bilin: sota masopngil son Apo Shiyos, sota ngaaw i aramid to, sota eg to amten mengiredjaw son Apo Shiyos, sota toon bimonon ni ameto, ono ineto, ono bimonon ni kait to.

<sup>10-11</sup> Nay-awat ira jay ya bilin nen Apo Shiyos say mebanshaanan ira jay ya totoo: sota mabii tan maleki, tan dakin daleki met laeng i toka itoli, tan sota toon mengibot ni kait ton too ja to idako, tan sota ma-owap, ono mansangba ni toka pengi-owap. Nay-awat iyay ya bilin nen Apo Shiyos say mebanshaanan sota toon kompormiy toka pesing ja maykontra shi toro nen Apo Shiyos. Sajay ya toro nen Apo Shiyos, si-katoy

koston toro ja enshiy maka-inges so et si-katoy wára nodta mapteng nga shamag pangkep so nen Cristo ja inpiyal nen Apo Shiyos son si-kak ja nak ngo itoro. Jet si-katoy emengi-kan ni bindisiyon.

<sup>12</sup> Ebadeg i iyaman ko son Cristo Jesus ja Apo tayo, ta in-aknan towak ni kedsang ko, say tongpalen ko sota piyan to. Inbilang towak ey naka mepiyal; isonga shinotokan towak ja mansilbi son si-kato.

<sup>13</sup> Nonta pilmiro ja enshi pay laeng i pamatik son Apo Jesus, ngaaw i inkokowan ko pangkep son si-kato, eshakil i pinedigat kon too to, tan binebaingan ko pay ira. Nem kinaasi-an towak, ta ekak amta ey ngaaw sotan na dingdingkak.

<sup>14</sup> Jet ebadeg ga pasiyay tolong nen Apo Jesus son si-kak, isonga ewara-anak ni semek tan pamati, ja inges to ngoy semek tan pamati ja ewara nonta ira kait kon emati son Cristo Jesus.

<sup>15</sup> Jet iyay pay i ikowan ko ja enshiy mo panshoshowa-an et sajay, agpayson mepati, panshindan, jey si Cristo Jesus, dimaw alid ja dobong ja mengisedakan ni toon ngaaw i aramid sha et si-kak i kabalkan i basol to son si-karen emin.

<sup>16</sup> Say kabol la kinaasi-an towak so, jey angken na si-kak i kabalkan i basol to, piyan nen Jesu-cristo ja ipa-sas i ebadeg ga ka-anos to, say waray pengasan ira nonta toon memati ali son si-kato ja mewad-an ni biyag ja enshiy to engintegán.

<sup>17</sup> Isonga no mebedin koma, si Apo Shiyos komay i-aknan tayo so ni shayaw tayo, ta si-katoy ari ingkatod ingka, ja eg metmetey, tan eg ma-sas. Si-katoy podnon Shiyos, enshiy eshom.

Si-katoy panshedjawan ingkatod ingka! Siya, satan da.

<sup>18</sup> Niman, si-kam Timoteo, ja naka ikarin anak ko shi pamati, iyay i ibilin ko son si-kam, ja toloy nonta naypadto maypangkep son si-kam nontan da. Saja inkowan nonta para padto nontan, si-katoy nemnemnemen mo, ta si-katoy mengi-kan ni kedsang mon mekisengo so nonta ira eg makakosto niyay ya koston toro.

<sup>19</sup> Jet say singa almas mo, sota makedsang nga pamatim tan sota mapteng nga nemnem mo. Nemnemnem mo ira jay ni olay, ta waray eshom ma toon eg ira nannemnem ni mapteng, nakol ni epilshiy pamatira.

<sup>20</sup> Jet say showa so ira niyay, si Himinio nen Alejandro. Jet sajay iren too, in-awat ko nin ira so nen Satanas, balang nem maynemneman ira et ibi-jag sha sota ngaaw wa shaka ikokowan maypangkep so nen Apo Shiyos.

## 2

*Say pesing jo say na-olnos kayon emati son Cristo*

<sup>1</sup> Jet sajay iray ibilin ko son si-kam. Say pilmiro, eg mo dibdibkan ja manshewat son Apo Shiyos ni olay. Irewat mo son si-kato sota angken nganton kasapolan, agdalo sota mesepol ni eshom ma totoo, tan mesepol pay ja man-iyaman ka para so ni emin na totoo.

<sup>2</sup> Tan irewatim iray a-ashi, tan sota ira eshom ja nankengato i toray sha, say mapteng i pengitoshay sha et say mewad-an kito ni etalnen panbiyag ja enshiy kolo, jet say eg medingding

i tayoka panshedjaw son Apo Shiyos, tan say eg medingding pay sota mapteng nga ogadi tayo.

<sup>3</sup> Sajay i mapteng nga koston ka-aporbalin Apo Shiyos. Si Apo Shiyos, si-katoy mengisedakan son si-katejo,

<sup>4</sup> jet say piyan to, maysedakan ngon emin i too, tan piyan ton amta-en sha i maypangkep ni podnon pamati.

<sup>5</sup> Ta si Apo Shiyos, sakey to, enshiy eshom ma Shiyos et sakey ngo bengat i mengi-sop ni too so nen Apo Shiyos, enshiy eshom — si Cristo Jesus bengat, ja mismon too.

<sup>6</sup> Si Cristo Jesus, si-katoy engi-kan shorog ni bakdang ton etey shi koros ja engikesho ni basol tayo, say may-a-sop kito son Apo Shiyos, ja istay naysi-jan son si-kato. Sajay i inpasing nen Cristo ni koston timpo ja inkowan nen Apo Shiyos et si-katoy ka-amta-an to ey ensemek shakito nen Apo Shiyos.

<sup>7</sup> Jet sajay i kabol la shinotokan towak son manbedin ni apostol ja mengitosho tan mengikowan ni podnon pamati so nonta ira toon aliwen Hodiyo. Jet sajay ya inkowan ko, agpayso; aliwen naka man-o-owap.

<sup>8</sup> Isonga say piyan ko, no mesa-nop i emati son Cristo shi emin na dogad, mesepol la sota dalekiy manshewat son Apo Shiyos. Nem no timpon panshewat, mesepol la metopog i nem-nemen sha ja si Apo Shiyos bengat; aliwen en metaksholan ni bonget ono empait ta nemnem so ni eshom.

<sup>9</sup> Jet si-kayo ngon bibii, asas joy itsora ni baro jo, aliwen jo ida-kad i bisti, tan aliwen

sota bowek joy jo singsingpeten; aliwén kayo man-osal ni kompormin ebanol ja alkos ni baro, ja balitok ono eshom iren nankepalit i bayad to.

<sup>10</sup> Say mesepol et mango, sota mapteng nga ogadi. Si-katoy anam ni biin kowan to ey waray pamati to.

<sup>11</sup> Jet say kowan ko son si-kayon bibii, mesepol la no timpo ni pan-ashal jo, on-eg-eket kayo koma ja i-onod joy kowan ni daleki.

<sup>12</sup> Ekak itolok ja mantosho iray bibii, ta no sajay i medeka, ja pa-so-an shay daleki, singa si-karay mengitoshay ma ni daleki. Ekak koston manbedin jen engato i saad ni bibii, say eg sha itorayan i daleki. Mesepol la on-eg-eket ira.

<sup>13</sup> Ta say epangdon pinalsowa nen Apo Shiyos, si Adan, asan si Eva.

<sup>14</sup> Tan aliwén si Adan i nay-owapan, no diket sota bii, jet si-katoy bimasol.

<sup>15</sup> Isonga emandikat ni toka pan-enak, nem maysedakan met laeng no itoloy ton memati son Cristo, tan no sesmeken toy kait to, tan no maytotop i ogadi to nodta piyan nen Apo Shiyos, ja amta ton menngel ni bakdang to shorog.

### 3

<sup>1</sup> Agpayso noman sota kowan sha ey, “Mapteng no say too ket, piyan ton mengipangolo ira ni emati, ta epateg sotan na obda.”

<sup>2</sup> Nem mesepol la say mengipangolo, sota toon maronong ja enshiy mebedaw son si-kato; mesepol la sota sakey i asewa to, tan aliwén dabas i ogadi to, no diket manemnem ni olay ni kosto;

mesepol la wáray amta to, tan masintil ni bisita to, tan mesepol la kabaalan ton mengitosho.

<sup>3</sup> Mesepol la aliwén maboteng, ono masongbat, no diket na-anos, ono aliwén mabekal, tan aliwén pilak i toka nemnema.

<sup>4</sup> Tan mesepol la amta ton mengolnos ni pamilja to, say sota annak to, eg ira onpa-so, nem onoren sha sota mapteng nga ogadi to.

<sup>5</sup> Epateg iyay, ta no eg to amten mengolnos ni pamilja to, eg to ngo kabaalan na mengiredan ira nonta emati son Apo Shiyos.

<sup>6</sup> Aliwén sota badbadon emati i mengipangolo, ta baka ondastog, nakol ni ingesen tos Satanas ja dimastog et shinosá nen Apo Shiyos.

<sup>7</sup> Say mengipangolo, sota enshiy embalaw ni too son si-kato, agdalo sota ira eg memati, say enshiy sha ikokowan na ngaaw pangkep son si-kato, tan say enshiy osalen nen Satanas ja mengadilaw son si-kato ni toka pengipangolo.

<sup>8</sup> Iyay ngoy maypangkep nodta ira kaontolong so nonta ira pangolo ni emati. Mesepol ngon manemnem ira: mebedin na kepanshindiya toka ikowan, aliwén maboteng, aliwén magamkam ni kompormi.

<sup>9</sup> Tan mesepol pay ya topogen toy nemnem to nodta pamatin inpa-amta nen Apo Shiyos ja enshiy showashowa to.

<sup>10</sup> Paras mo nin ira ja mansilbi ni sanká-atikan, jet no asen mo ey enshiy mebedaw son si-kara, mebedin ma ja ewáten mo ja ontolong ira so nonta pangolo ni emati.

<sup>11</sup> Kasta met sota a-asawa sha, mesepol la mapteng ngoy ogadira: aliwén na masomang ni

kait to, aliwén na mabonget, tan emepiyal shi emin na banag.

<sup>12</sup> Sota ira kaontolong so nonta ira pangolo ni emati, mesepol la sakey bengat i asewa to et mesepol la amta ton mengolnos ni annak to, tan sota eshom ma wared pamilja to.

<sup>13</sup> Jet sota ira para tolong ja waray panbe-nagan ali ni obdara, kaishayaw ali ni totoo nem ka-onoran et mebedin iren maypiyal ja mengitosho nonta pamati pangkep so nen Cristo Jesus.

<sup>14</sup> Piyan kon ondaw den shagos say asen taka, nem ninemnem ko ey mapteng no isolat ko iyay ya bilin ko son si-kam,

<sup>15</sup> say amtam i pesing mo so nonta ira emati son Apo Shiyos, ta si-karay singa pamilja nen Apo Shiyos ja sibibiyag. Ta baka metaktakak da. Mesepol la amtam i pesing mon meno-tok nonta mengipangolo so nonta emati, ta si-katejon emati i naypiyal ja mengitosho ni podnon pamati, si-katejo met laeng i ontiped so ni aliwén koston toro.

<sup>16</sup> Mapteng noman nga agpayso i pamati ja inpa-amta nen Apo Shiyos son si-katejo pangkep so nen Cristo Jesus, ta si Jesus nontan, nay-anak shi too et tinongpal ton emin sota inpangitorong ni Ispirito Santo nen Apo Shiyos son si-kato, jet inon-an ira ni anghil. Jet niman, emankaitoron emin i maypangkep son si-kato shi emin na sakop ni dobong, jet eshakil iray emati. Jet nay-oli ja dimaw shi dangit ja kad-an nen Apo Shiyos.



## 4

<sup>1</sup> Sota Ispirito Santo nen Apo Shiyos, edawag ja inpa-amta to ey no ma-onod alin timpo, waray eshom so nonta ira emati ja mengibi-jag ni pamatira, jet say onoran sha, sota toro nen Satanas ja o-owap.

<sup>2</sup> Sotan na toro, si-katoy kowan ni toon ma-owap say ma-adilaw kari sota toon mapteng i nemnem sha. Si-kara, enshi kariy mapteng nga nemnem sha; isonga enshiy shaka pengisekit ni kait sha.

<sup>3</sup> Say sakey ya toro sha, kowan sha ey parit i pengesawa, tan kowan sha pay ey waray parit ta mekan. Nem ba-ngas sha kari, ta si Apo Shiyos i emalsowa ni emin na mekan et say piyan to, man-iyaman kito nin, asan kana, agdalo son si-katejon emati ja maka-amta ni podno.

<sup>4</sup> Kapodpodno-an to, emin na palsowa nen Apo Shiyos, mapteng; isonga enshiy en maypeshit ja kowan sha ey eg mekan, nem man-iyaman kito et mango nin son Apo Shiyos asan makan.

<sup>5</sup> Ta no manshewat kito nin asan mangan, eg bedawen nen Apo Shiyos, ta binindisiyonan to met nonta pinalsowa to.

<sup>6</sup> No sajay i ibilin mo so nonta ira a-aki shi pamati, mapteng i moka pansilbi so nen Cristo Jesus et ipa-sas mo pay ey amtam i esel nen Apo Shiyos maypangkep ni pamati son Cristo, tan sota mapteng nga toro ja inonod mo shorog.

<sup>7</sup> Eg mo kari itentenengan sota enshiy olog ton istoriya, ja kowan ni eshom ey eshiyosan. No diket say dag-en mo, ashal mo shorog i bakdang mo maypangkep ni eshiyosan na nemnem.

<sup>8</sup> Say bakdang, mesepol to sota kowan sha ey exercise ni olay say makedsang, nem mas epat-pateg pay ja i-ashal shi bakdang tayoy eshiyosan na nemnem tan aramid, ta ebadeg i itolong to ni saja maramen biyag niman, tan shi man-onod alin biyag shi dangit.

<sup>9</sup> Sajay ya inkowan ko, enshiy pan-showashowa-an; isonga si-katoy panshinda koma ja onoren ni emin.

<sup>10</sup> Sajay i kabol la tayoka ikalkalikatini mengitoshon ni eshiyosan na nemnem, ta si Apo Shiyos i tayoka panshindi ja sibibiyag. Si-katoy mengisedakan ni emin na too, agdalo sota ira emati son Jesucristo.

<sup>11</sup> Sajay i ibilin mo, tan itorom so nonta ira emati.

<sup>12</sup> Kareka onbaing no waray memedaw son si-kam, ja kowan sha ey nga-nga ka nin pay laeng, no diket ipa-sas mo et so nonta ira emati i mapteng nga pekitbal, tan mapteng nga ogadi. Ipa-sas mo pay i semek mo, tan sota pamatim, tan sota karonong mo.

<sup>13</sup> Say dag-en mo ingkatod ekak da onsabi, ibasam sota naysolat ja esel nen Apo Shiyos no bayag da, tan i-odog mo say ewatan shen pasiya, tan itoshom pay son si-kara sota emin na maypangkep ni pamati.

<sup>14</sup> Piyon kon penemnem son si-kam sota in-shotok shaka so nonta ira pangolo ni emati. Jet nontan, insakpal shay takday sha son si-kam ni in-awatan sha son si-kam ni nebeng ja mengiredan so nonta ira emati et inpadora ey waray i-akan nen Apo Shiyos ja kabaalan mon dag-en.

Jet osal mo itan; karam i-oway.

<sup>15</sup> Nemnem mo iya kalko ja nay-awat son si-kam. Si-katoy dag-en mo ni olay, eg mo dibdibkan, say asen shay panbenagan mo.

<sup>16</sup> Tanshaanim i itsora ni moka panbiyag, tan tanshaanim ma pasiya ey kosto sota moka pan-itoro. Ta no sajay i pesing mo, bakdang mo met laeng i isalakan mo, tan maysedakan pay ira sota mengitneng ni ikowan mo.

## 5

<sup>1-2</sup> No waray bidinen mo, i-enam mod tawen sha. No nankedakay, karam iseg-ang nga pasiya, no diket singpet moy tebal son si-kara, ja inges to ngoy moka panrispito so nen amam. Sota ira bedoleki, ibidang mo ey singa a-akim ira. Jet sota ira nankeba-kol, ibidang mo ey singa inam, jet kasta met sota ira memeshikit, ikeshim ey singa orishiyan mo ira, ja enshi komay ngaaw wa pangkep mo son si-kara.

<sup>3</sup> Sota ira bibiin nankebalo ja enshin polos i ontolong son si-kara, mesepol la metodongan ira.

<sup>4</sup> Nem sota biin ebalo ja waray anak to, ono apo to, sotan iray nebeng ja ontolong son si-kato koma, ta pamilja to met. Mesepol la sobalitan sha koma sota inpaba-deg sha son si-kara. Sajay i piyan nen Apo Shiyos ja toka aporbali. No sajay i pesing sha, shaka pan-ipa-sas ey kostoy pamatira son Cristo.

<sup>5</sup> Sota biin ebalo ja enshin polos i ontolong son si-kato, si-kato komay todongan jo, ta si Apo

Shiyos i toka panshindi et si-katoy toka panshewshewati ni dinedabi tan inakew ja mengi-kan ni kasapolan to.

<sup>6</sup> Nem sota biin ebalo ja sota daddadsak i toka nemnemnema bengat, enshiy silbi to. Angken wára pay laeng ja emanbibiyag, singa naybilang nga etey.

<sup>7</sup> Sota inkowan ko la, si-katoy ibilin mo, say angken sipa, enshiy sha bedawen so nonta ira emati.

<sup>8</sup> Sota toon eg to sintilen i partido to, agdalo sota eman-iyen shi baley to, eg to inonod sota toro pangkep ni pamati son Cristo, jet ekarkaron ngaaw sotan na ogadi nem say ogadi ni enshiy pamati to son Apo Shiyos jen too.

<sup>9</sup> Sota ira bibiin nankeballo ja enem ma poloy tawen sha, tan esolok, si-kara bengat i i-eshom mo shima dista-an ni ebalon mesepol la metodongan ni olay ingkatod ketey sha, nem mesepol la sota pinsak bengat ja eki-sawa.

<sup>10</sup> Nem mesepol mowan na sota enshiy ngaaw wa ogadi to ja kebedawa ni eshom, tan sota inajowanan toy anak to ja inpaba-deg, sota amta ton menintil ni bisita to, sota kaontolong pay so nonta ira kait ton emati, sota amta ton mengajowan ni maligdigat, tan sota kaontolong shi emin na mapteng nga obda.

<sup>11</sup> Nem sota ira marikit ja nankeballo, angken eg mo i-eshom nin ira nodta dista-an ni nankebalon mesepol la metodongan ni olay ingkatod ketey sha, ta baka et ey mengebak sota nemnem shen meki-sawa mowan ira. Jet medingding mala sota inpankari sha ja pansilbi so nen Cristo.

<sup>12</sup> Nakol ni sajay et ngo mowan i kebedawan sha, no sajay i dag-en sha, ta eg sha ma itoloy sota kari sha ja mansilbi ira son Cristo.

<sup>13</sup> Tan sakey pay, baka mesiwat ira ni aka-akad sha bengat shi kebalebaley et manbedin ira ni esarot. Tan menomang pay ira ni kait sha; pekibiyangan sha pay i aliwen obdara, tan baka iba-ngat shay notnot ni aliwen kosto.

<sup>14</sup> Isonga say kowan ko, sota ira bibiin nankebalo ja memeshikit pay laeng, mapteng no meki-sawa mowan ira, say manpamilja ira et say ontongaw ira ja wara may baley shen bantayan sha. Sajay i piyan ko, say enshiy en bedawen ira nonta enshiy pamati to son si-katejon emati.

<sup>15</sup> Sajay i kowan ko, ta wara iray eshom ma nankebalo ja ngaaw i dingkara. Say inonod sha, sota aramid nen Satanas ja ngaaw.

<sup>16</sup> Sota ira bibiin emati ja waray partido shen eballo, si-karay ontolong son si-kara, say sota inedos ira nonta emati, maytodong so nonta eshom ma nankebalo ja enshin polos i kaontolong son si-kara.

<sup>17</sup> Iyay mowan i ikowan ko pangkep nonta pangolo ni emati. Sota ira pangolo ja mapteng i shaka pengiredan, agdalo sota ira eman-obden pasiya ni shaka pantosho tan shaka pengikowan ni maypangkep so nen Jesucristo, mesepol la ma-shoman i sowilshora.

<sup>18</sup> Ta waray naysolat nonta bayag da, ja kowan to ey, "Sota nowang ja emengidik ni pagey, karejo bosalen, no diket itodok jon mengan." Tan wara pay i kowan to ey, "Say man-obda, mesepol la mesowilsho-an."

<sup>19</sup> No wáray toon kowan to ey wáray pangolo ni emati, ja nanbasol, karam nin patpati-en, no sakey bengat i engikowan. Mesepol la showa, ono tedo i onpaneknek so, asan moka pati-a.

<sup>20</sup> No wáray pangolo ja ngaaw i toka dagdag-a, togon mo shi sango-an ni karakdan say mebidin, jet say wáray tekotan ngo ni eshom, ja eg sha onoran sotan na ngaaw wa aramid.

<sup>21</sup> Jet si-kam Timoteo, sajay i bilin ko son si-kam et nemnem mo ni olay ey shakitoka pan-os-osshongi nen Apo Shiyos, tan si Jesu-cristo, tan angken pay sota ira anghil ja pinidi nen Apo Shiyos. Isonga say kowan ko, sajay ya bilin, si-katoy onoren mo, jet enshi komay mo en paboran, no diket pan-i-inges moy pesing mo ni toon inpangolo-an mo.

<sup>22</sup> Kareka man-a-agag ja menotok ni mengipan-golo ira nonta emati, ta baka manbesol sotan na too; nakol ni mayda-kam ka nonta ngaaw wa dingka to. Nemnem mo nin asan moka dag-a say eshalos ka ni olay.

<sup>23</sup> Aliwén shanom ni olay i ishenon mon inomen, no diket panginom ka ni ootik ka adak nem singka-shom, say eg mema-ma sota sigod ja sakit ni ekes mo, tan sota eshom pay ya sakit mo.

<sup>24</sup> Sota ira eshom ma too, edawag i basol sha et inam-ay i kekowis sha. Nem sota basol ni eshom, aliwén edawag, nem ma-amta-an ngo eshan.

<sup>25</sup> Kasta met i mapteng nga aramid. Waray ma-amta-an shagos, nem wáray eshom ja eg nin ma-amta-an niman. Nem no ma-onod alin timpo, si Apo Shiyos, ipa-amta to ey sotan ngo eshan i mapteng nga aramid.

## 6

<sup>1</sup> Iyay pay i piyan kon ibilin son si-kam ja pesing ni baga-en. Mesepol la rispito-en shen pasiya sota ira apo sha, ja aliwén sinsinan, say sota ngaran nen Apo Shiyos, tan mapteng nga toro pangkep son Cristo, eg damsisen ni eshom.

<sup>2</sup> Sota baga-en ja emati son Cristo i apo to, eg to koma nemnememen ey angken eg to pati-en sotan na apo to ta naybilang ey agi tod pamati. Mesepol la singpeten to ngo eshan ja mansilbi so nonta apo to. Man-obden kosto, ta say onkon-od nodtan na obda to, kait ton emati, ta si Apo Shiyos, nan-inges i semek to son si-karen showa.

### *Ka-onoran na togon*

Iyay pay i piyan kon itorom tan i-adok mo shita toom.

<sup>3</sup> No wáray eshom ma toon apil i toro to, ja aliwén inges to iyay ya mapteng nga toro ja edapo so nen Apo Jesucristo, ja eg mengitoshong ni eshiyosan na nemnem,

<sup>4</sup> sotan na too, edastog, enshiy amta to. Sotan na toro to, si-katoy emengi-kan ni kolo ja pansosongbatan, ono panbabakalan maypangkep ni esel bengat. Jet say pantongpalan niyay, apal, bonget, kesekitan ni nemnem ni eshom, tan eg panpipiniyal.

<sup>5</sup> Sajay pay i mengi-kan ni pansosongbatan ni toon kolang i shaka pannemnem, ja eg maka-awat ta pasiya ni maypangkep ni podno. Agdalo sota toon say wáred nemnem sha, kowan sha ey panbaknangan i pamati son Cristo.

<sup>6</sup> Nem say pamati, ebadbadeg ngo eshan i itolong to son si-katejo, no mepnek kito ni kasesaad tayo.

<sup>7</sup> Ta nonta inkay-anak tayo shiya dobong, enshiy tayo di inta-jon et no metey kito ngo, enshi met laeng i tayo ita-jon.

<sup>8</sup> Isonga no wára et i kenen tayo, tan ebaro-an kito, mepnek kito; eg tayo koma toy-an.

<sup>9</sup> Nem sota toon baknangan toy toka nem-nemnema, inam-ay ya ma-ewis ja mandeka ni angken nganton ngaaw. Jet emesaol la mengamkam ni ka-iri-irin ja enshiy silbi to. Anongosto ma ey sotan met laeng i emengi-kan ni kesheshalan to, ta mepilshi ingkatod ingka.

<sup>10</sup> Jet sota pengamkam ni pilak, si-katoy panshoki-i ni emin na ngaaw. Agpayso ey sota ira eshom ma engamkam ni pilak, inbi-jag sha may pamatira. Nem anongosto ma ey ensakit i nemnem sha, ta naydaw-an iren pasiya nodtan na dingkara.

<sup>11</sup> Nem si-kam Timoteo, ja too nen Apo Shiyos, arawi-im ma emin sota ngaaw wa ogadi ja inkowan ko la. Jet say nemnemen mo, sota kinashonong, sota eshiyosan na nemnem, sota pangkep ni pamati son Apo Jesus, sota semek mo ni totoo, sota pengitoded mo ni digat, tan sota kina-anos mo.

<sup>12</sup> Dagam i kabaalan mon man-obda may-pangkep nonta pamati, tan nemnemnem mo sota i-awat nen Apo Shiyos son si-kam ja biyag ja enshiy to engintegangan. Si Apo Shiyos i mismon enotok son si-kam, tan engi-kan nontan na biyag son si-kam, nonta engikowanan mod karakdan



ey emati ka. Jet eshakel nontan i engitneng.

<sup>13-14</sup> Iyay i ibilin ko son si-kam Timoteo, jet si-katoy nemnemnemen mo. Ta si Apo Shiyos, tan si Jesucristo, shakitoka os-osshongi ni olay. Si Apo Shiyos, si-katoy engi-kan ni biyag so ni emin na palsowa et si Cristo Jesus, nonta simango so nen Pontio Pilato, inkowan toy podno. Jet say bilin ko, sajay. Emin sota bilin da ja nay-awat son si-kam, onod mon emin, karam dabdabsan i eshom. Jet sotan ni olay ingkatod imotok ali nen Apo tayo ja si Jesucristo.

<sup>15</sup> Jet si Jesucristo, ondaw ali shi koston timpo to ja insagana nen Apo Shiyos. Si Apo Shiyos bengat i Kangeto-an, si-katoy ari ni emin na ari, tan apo ni emin na apo.

<sup>16</sup> Si-kato bengat i Shiyos ja eg metey, jet shima misonon kawad-an to, angken sipa, enshiy toon en onshanon so, ta emenenilin pasiya. Angken sipen too, enshiy en engasas son si-kato, ono mengesas so. Jet si-katoy mayshedjaw ja toray ja Manakabalin ingkatod ingka. Siya, satan da!

<sup>17</sup> Ikowan mo so nonta ira bebaknang nin niman na sibibiyag ired ja dobong ey aliwen ira ondastog, tan aliwen sota pilak shay sha en panshingan, ta aliwen sigorado. Isonga say panshingan sha koma, si Apo Shiyos, ja emengi-kan ni emin na kasapolan tayo, ja tayoka kenkenasa.

<sup>18</sup> Say dag-en sha koma, sota panmaptengan ni kait sha, ja todongan sha ira, ta sotan i may-eshig shi koston baknangan. Mesepol la amtaren mengaasi koma, ja esaganen mengila-kam ni olay.

<sup>19</sup> No sajay i pesing ni bebaknang, mapteng, jet wáray may-eshig ja singa poonan shed dangit ja kenasan shed man. Sajay i pesing nga menigorado ni podnon biyag shi dangit.

<sup>20</sup> Si-kam Timoteo, mesepol la eg mo baybay-an sota inpiyal nen Apo Shiyos son si-kam, ja dag-en mo. Kareka maybibiyang nonta enshiy silbi ton toro ni eshom, ja singa notnotnot bengat. Say itsora nontan na too, ireka mansosongbat bengat. Kowan sha ey wáray inpa-amta kono nen Apo Shiyos son si-kara, nem enshi kari.

<sup>21</sup> Waray eshom iren too ja bimaki nonta intenengan sha iyay, jet enshi mala ira shi pamati son Jesus.

Jet sapay koma ta si Apo Shiyos i mengaasi son si-kam.

**Dibshon Mengi-kan Ni Pansigshan  
Ibaloi: Dibshon Mengi-kan Ni Pansigshan (New  
Testament)**

copyright © 1978 Wycliffe Bible Translators, Inc.

Language: Ibaloi

Contributor: Wycliffe Bible Translators, Inc.

All rights reserved.

2025-05-03

---

PDF generated using Haiola and XeLaTeX on 2 May 2025 from source files  
dated 3 May 2025

6f85e932-8eee-5911-b890-a31a1da75d8c